



ԵՄ-ՀՀ «ՀԱՄԱՊԱՐՓԱԿ ԵՎ ԸՆԴԼԱՅՆՎԱԾ ԳՈՐԾԸՆԿԵՐՈՒԹՅԱՆ

ՀԱՄԱԶԱՅՆԱԳՐԻ» 366-ՐԴ ՀՈԴՎԱԾՈՎ ՆԱԽԱՏԵՍՎԱԾ ՔԱՂԱՔԱՅԻԱԿԱՆ

ՀԱՍԱՐԱԿՈՒԹՅԱՆ ՊԼԱՏՖՈՐՄԻ ԱՐՀՄԻՈՒԹՅՈՒՆՆԵՐԻ ՄԱՍՈՎ ՀԱՅԱՍՏԱՆՅԱՆ  
ԿԱԶՄԻ ՁԵՎԱՎՈՐՄԱՆ ԿԱՐԳ

1. 2017թ. նոյեմբերի 24-ին Հայաստանի Հանրապետության և Եվրոպական միության միջև ստորագրված «Համապարփակ և ընդլայնված գործընկերության համաձայնագրի» (այսուհետ՝ ՀԸԳՀ) 366-րդ հոդվածի համաձայն նախատեսվում է ձևավորել Քաղաքացիական հասարակության պլատֆորմ (այսուհետ՝ ՔՀՊ)՝ կազմված Եվրոպական միության քաղհասարակության, այդ թվում՝ Եվրոպական տնտեսական և սոցիալական կոմիտեի ներկայացուցիչներից և Հայաստանի Հանրապետության քաղհասարակության, այդ թվում՝ Հայաստանում գործող արհմիութենական և գործատուների կազմակերպությունների ներկայացուցիչներից:

2. Սույն կարգով սահմանվում են ՔՀՊ-ի կազմում ընդգրկվելու նպատակով՝ Հայաստանի Հանրապետությունում գրանցված արհմիութենական կազմակերպությունների (բոլոր մակարդակներում) ներկայացուցիչների ընտրությունն իրականացնող ընտրական հանձնաժողովի (այսուհետ՝ Ընտրական հանձնաժողով) գործառույթները, ինչպես նաև այդ հանձնաժողովի գործունեության կազմակերպման, ՔՀՊ-ի անդամների թեկնածուների առաջադրման և ընտրության (այսուհետ՝ ընտրություններ) անցկացման ընթացակարգերը:

3. Ընտրական հանձնաժողովը կազմված է 22 (քսաներկու) անդամից, որոնցից քսանմեկը Հայաստանի արհմիությունների կոնֆեդերացիայի (այսուհետ՝ ՀԱՄԿ) Գործադիր կոմիտեի անդամներն են, իսկ մեկը՝ ՀԱՄԿ-ի կազմակերպատուսումնական կենտրոնի ղեկավարը: Ընտրական հանձնաժողովն իր կազմից ընտրում է հանձնաժողովի նախագահ՝ բաց քվեարկությամբ, ձայների պարզ մեծամասնությամբ:

4. Ընտրական հանձնաժողովի անդամը չի կարող լինել թեկնածու այս գործընթացներում: Նրա ներկայացրած կազմակերպությունն իրավունք ունի որպես թեկնածու պատվիրակել այլ անձի:

5. Ընտրական հանձնաժողովի կազմում չեն կարող լինել միմյանց նկատմամբ առաջին կարգի ազգականներ (հայր, մայր, զավակ, ամուսին, եղբայր, քույր): Այդպիսի հանգամանք ի հայտ գալու դեպքում ՀԱՄԿ-ի կազմակերպատուսումնական կենտրոնը դիմում է Ճյուղային Հանրապետական միությանը՝ ներկայացնելով իրավիճակը և առաջարկելով փոխարինել պատվիրակին:

## 2. ԸՆՏՐԱԿԱՆ ՀԱՆՁՆԱԺՈՂՈՎԸ

6. Ընտրական հանձնաժողովի գործունեությունը հիմնված է ՔՀՊ թեկնածուների ընտրության արդարության, պայմանների հավասարության, ընթացակարգի թափանցիկության և հրապարակայնության սկզբունքների վրա:

7. Ընտրական հանձնաժողովը՝

- 1) Կազմակերպում և անցկացնում է թեկնածուների ընտրությունը,
- 2) Իրականացնում է նախնական ստուգում սահմանված չափանիշներին թեկնածուների համապատասխանության վերաբերյալ
- 3) Կազմում և հրապարակում է հաղթող ճանաչված վեց արհմիութենական կազմակերպությունների ներկայացուցիչների, այդ թվում՝ երեք փոխարինող անդամների ցուցակը
- 4) Լուծում է ընտրության գործընթացի հետ կապված այլ հարցեր

8. Ընտրական հանձնաժողովի նիստն իրավագոր է Հանձնաժողովի անդամների կեսից ավելիի մասնակցության դեպքում:

9. Ընտրական հանձնաժողովի որոշումներն ընդունվում են բաց քվեարկությամբ՝ նիստին ներկա անդամների ընդհանուր թվի ձայների մեծամասնությամբ:

10. Ընտրական հանձնաժողովի նիստերը ձայնագրվում են: Ընտրական հանձնաժողովի նիստի վերաբերյալ կազմվում է թղթային արձանագրություն: Ընտրություններին կարող են ներկա գտնվել զանգվածային լրատվության միջոցների և քաղաքացիական հասարակության կազմակերպությունների ներկայացուցիչներ:

### 3. ԸՆՏՐՈՒԹՅՈՒՆՆԵՐԻ ԱՆՑԿԱՅՈՒՄԸ

11. Սույն կարգի ընդունումից և ՀԱՄԿ-ի կայքում դրա հրապարակումից հետո, Ընտրական հանձնաժողովը, երկու աշխատանքային օրվա ընթացքում, ՀԱՄԿ-ի աշխատակազմի միջոցով ընտրություններ անցկացնելու մասին հայտարարությունը հրապարակում է ՀԱՄԿ-ի պաշտոնական կայքում, ՀԱՄԿ-ի և ՀԱՄԿ-ի կազմակերպատուսումնական կենտրոնի ֆեյսբուքյան էջերում, ՀԱՄԿ-ի տելեգրամ ալիքում:

12. Հայտարարությունը պետք է պարունակի առնվազն հետևյալ տվյալները՝

ա. ՀՀ և ԵՄ «Համապարփակ և ընդլայնված գործընկերության համաձայնագրով» նախատեսված քաղաքացիական հասարակության պլատֆորմի թեկնածուներին ներկայացվող պահանջները,

բ. ընտրություններին որպես թեկնածու մասնակցելու համար անհրաժեշտ փաստաթղթերի ցանկը,

գ. ընտրությունների անցկացման պայմանները,

դ. փաստաթղթերի ներկայացման ժամկետները և վայրը, այդ թվում՝ էլեկտրոնային փոստի հասցեն:

13. Թեկնածուներին ներկայացվող պահանջներն են՝

- Արհմիութենական գործունեության կամ ՀԸԳՀ-ով սահմանված ոլորտներից որևէ մեկում առնվազն երկու տարվա գործունեության իրականացում, որոնց արդյունքներով կազմվել է (են) զեկույց(ներ), այդ թվում՝ հետազոտություններ, վերլուծություններ, հայեցակարգեր և այլն,

- ՀԸԳՀ-ի իրականացման գործում պետական կառավարման մարմիններին խորհրդատվական աջակցություն տրամադրելու տեսլականը,

- ՀԸԳՀ-ի կատարման գործընթացի մշտադիտարկման տեսլականը

14. Ընտրվելու իրավունք ունեն արհմիություններում և/կամ ՀԸԳՀ-ով սահմանված ոլորտներից որևէ մեկում վերջին երկու տարիների ընթացքում գործունեություն ծավալած և զեկույցներ հրապարակած, միայն արհեստակցական կազմակերպությունների ներկայացուցիչները՝ բոլոր մակարդակներից:

15. Ընտրություններին մասնակցելու հավակնություն ունեցող արհմիութենական թեկնածուն (այսուհետ՝ Հավակնորդ) մինչև 2022թ. մարտի 1-ը ՀԱՄԿ-ի Կազմակերպատուսումնական կենտրոնի միջոցով Ընտրական հանձնաժողովին է ներկայացնում ընտրություններին մասնակցելու համար անհրաժեշտ փաստաթղթերը (այսուհետ՝ փաստաթղթեր), ինչպես նաև իր հետ հաղորդակցվելու համար անհրաժեշտ կոնտակտային տվյալները:

16. Հավակնորդին ներկայացվելիք փաստաթղթերը պետք է ներառեն /պատճեններ/՝

- առաջադրող արհմիութենական կազմակերպության պետական գրանցման վկայականը, կազմակերպության ոլորտային գործունեության մասին տեղեկություններ (Organisation profile),

- հավակնորդի կենսագրական տվյալները,

- ՀԸԳՀ-ի իրականացման գործում պետական կառավարման մարմիններին խորհրդատվական աջակցություն տրամադրելու տեսլականը՝ շարադրված մինչև մեկ A4 էջ ծավալով,

- ՀԸԳՀ-ի կատարման գործընթացի մշտադիտարկման տեսլականը՝ շարադրված մինչև մեկ A4 էջի ծավալով,

- կազմակերպական կարողությունները հավաստող տեղեկանք (արհեստակցական կազմակերպությունից),

- հայտարարագիր այն մասին, որ հավակնորդը նախընթաց առնվազն 1 տարվա ընթացքում չի եղել պետական իշխանության մարմնի աշխատակից՝ մշտական աշխատանքային պայմանագրով կամ վճարովի ծառայություններ չի մատուցել պետական իշխանության մարմնին, ինչպես նաև՝ ընտրվելու դեպքում ՔՀՊ կազմում չի դառնալու պետական իշխանության մարմնի աշխատակից կամ վճարովի ծառայություն չի մատուցելու պետական իշխանության մարմնին:

- Միջազգային և տեղական կազմակերպությունների կողմից կազմակերպված աշխատանքային օրենսդրության և արհմիությունների գործունեության վերաբերյալ դասընթացների, սեմինարների հավաստագրեր/ վկայականներ

17. Անգլերեն լեզվի գերազանց իմացությունը պարտադիր է:

**ՀԱՅՏԱՐԱՐՈՒԹՅՈՒՆ**

**շահերի բախման բացառման, մարդու իրավունքների հարգման և ակտիվ մասնակցության վերաբերյալ**

Ստորագրելով սույն հայտարարությունը՝ ես, .....  
.....-ս, երաշխավորում եմ, որ չեմ օգտագործի իմ դիրքը որպես Հայաստան-Եվրամիություն Քաղաքացիական հասարակության պլատֆորմի անդամ՝ իմ կազմակերպության կամ իմ առաջին կարգի ազգականների նյութական շահերը սպասարկելու նպատակով:

Ես նաև հավաստում եմ, որ հարգում եմ մարդու իրավունքները և ազատությունները՝ առանց խտրականության ըստ ազգային, ռասայական, կրոնական, սեռային պատկանելության կամ սեռական ինքնության, քաղաքական կամ այլ համոզմունքների, սոցիալական ծագման, ունեցվածքային դիրքի, ծննդավայրի կամ այլ հատկանիշների:

Ես երաշխավորում եմ, որ ներգրավված կլինեմ Պլատֆորմի աշխատանքներին անհրաժեշտ ակտիվությամբ, առանց հարգելի պատճառների չեմ բացակայի դրա նիստերից, դրա կազմակերպած մյուս միջոցառումներից և հանդիպումներից, կապահովեմ իմ աշխատանքների առավելագույն թափանցիկությունն ամբողջ հասարակության համար:

Ստորագրող՝ ..... Ստորագրություն

**ԵՐԱՇԽԱՎՈՐԱԳԻՐ**

**կազմակերպության ռեսուրսների ներդրման, քաղաքական աֆիլիացման բացառման և մարդու իրավունքների հարգման վերաբերյալ**

.....  
արհմիությունը, որի անդամ է Հայաստան-Եվրամիություն քաղաքացիական հասարակության պլատֆորմում ներգրավվող ..... -ը երաշխավորում է, որ կներդնի անհրաժեշտ ռեսուրսներ և կարողություններ նրա լիարժեք և անխափան գործունեությունը իրականացնելու համար:

Արհմիությունը հավաստում է, որ հարգում է մարդու իրավունքները և ազատությունները՝ առանց խտրականության ըստ ազգային, ռասայական, կրոնական, սեռային պատկանելության կամ սեռական ինքնության, քաղաքական կամ այլ համոզմունքների, սոցիալական ծագման, ունեցվածքային դիրքի, ծննդավայրի կամ այլ հատկանիշների:

Նախագահ՝ ..... Ստորագրություն .....